

## ***Sinn die Kinner gudd gezoh***

Sinn die Kinner gudd gezoh,  
iss e Mudda werklisch froh!  
Aach de Vadda, voller Stolz,  
saad: „ Die sinn aus meinem Holz.“  
Doch die Neschdhäkcher, die sinn´s gerad,  
mit denne ma meischdens Huddel hadd.

So aach in dem folschende Fall:  
Nenne ma denne Bub doch äänfach „Kaal“.  
Es Schaffe, iwwahaubt im Haus,  
war dem Lausert doch e Graus.  
Die Mamme lasst ne awwer wisse,  
dass all im Haushalt helfe misse.  
Was willer mache, er kummt nit umhin.  
Na jo, was sinn muss, das muss sinn.  
Doch äänes scheenen Dach´s in da Kisch,  
do leid morjens e Zeddel uffem Disch -  
on de Mamme adressierd -  
do wa so allerhond nodierd:

Brötchen gekauft	1,40
Müll runter gebracht	1,20
Zeitung raufgeholt	0,90
Geschirr abgetrocknet	1,50
Eier geholt	0,60
Tisch gedeckt	0,90
Schuhe weggebracht	1,50
Mit Rex Gassi gegangen	<u>2,00</u>
Das kostet zusammen	10,00 Euro

Die Mudda fierwerhaft iwwaleed,  
wasse dem Bub am beschde antworde dääd.  
Dann hadde Kaal, warum aach nit,  
grad so e kläänes Briefche gridd:

morgens wecken  
Frühstück machen  
Schulbrot bereiten  
einkaufen, Essen richten  
kochen, backen  
Wäsche waschen, bügeln, flicken  
Kranke pflegen  
bei der Schularbeit helfen  
öfter vom Turnunterricht abholen  
und...und...und...  
machen wir es rund:  
Das kostet zusammen null komma nix

Beim Friestigg morjens leid de Wisch  
näwem Kaal seiner Tass uffem Disch.

Ohne ze gugge vaschwind er im Buxesack.  
Kaal schnabbd sei Ronze – unn mit Sack unn Pack  
Haud er ab. Noch e kurzes „Tschiss“ –  
wie´s heit bei de Junge so Mode iss.

Dachsiwwa war die Mudda im Stress  
unn die gonz Sach war so gudd wie vagess.  
Om Oowend donn, de Kaal war bettbereit,  
so pinktlich wie nimmeh seit longer Zeit,  
do stedd er im Schlofonzuch do und druxt  
unn wunnert sisch, dass sei Mamme sisch nit muxt.  
Wie e armer Sinder, verschämd unn schenont,  
stedd er on de Zimmerwond.  
Dräd vun ääm Bään uffs onner unn waad,  
dass de Mudda endlich was saad.  
Unn pletzlich, aach das iss schunn ewisch nimmeh passiert,  
holld er sei Mamme um de Hals, gonz unscheniert.  
Er gebbd rer e Kuss, dass es nur so knallt.  
Jetzt unnadrickt sie die Träne mit Gewalt.  
Sie knuddelt ihr Bub und halt ne gonz fesched.

Wie isser jetzt glicklich: sei Mamme iss unn bleibt doch die Beschd.